

Na osnovu člana 41., stav (1), tačka c) Ustava Srednjobosanskog kantona / Kantona Središnja Bosna ("Službene novine SBK / KSB", broj 1/97, 5/97, 6/97, 2/98, 7/98 – ispravka teksta, 8/98, 10/2000, 8/03, 2/04 i 14/04), člana 28., stav (4) Zakona o poljoprivredi ("Službene novine FBiH", broj 88/07 i 4/10), Skupština Srednjobosanskog kantona, na sjednici održanoj dana _____.2013.godine, donosi

ZAKON

O NOVČANIM PODSTICAJIMA U POLJOPRIVREDI NA PODRUČJU SREDNJOBOSANSKOG KANTONA

I. OPĆE ODREDBE

Član 1.

(Predmet zakona)

Ovim Zakonom propisuju se u Srednjobosanskom kantonu (u daljem tekstu: **Kanton**) izvori i visina novčanih sredstava, mjere novčanih podsticaja u poljoprivredi, modeli podsticaja, opšti uslovi za ostvarenje novčanih podsticaja, korisnici novčanih podsticaja, postupak ostvarenja novčanih podsticaja, izvještavanje o realizovanim novčanim podsticajima, nadzor nad provođenjem ovog zakona, kaznene odredbe, kao i druga pitanja u vezi sa novčanim podsticajima na području Kantona.

Član 2.

(Svrha zakona)

Svrha donošenja ovog Zakona je provođenje harmonizacije mjera novčanih podsticaja sigurnosti i kontinuiteta novčanih podsticaja sa ciljem stvaranja i podsticanja poljoprivredne proizvodnje do nivoa samoodrživosti i profitabilnosti u formi tržišno orijentiranih robnih poljoprivrednih proizvođača, podsticanje tehničko-tehnološkog i organizacionog unaprjeđenja sektora poljoprivrede, osiguranje stabilnog poljoprivrednog dohotka i omogućavanje adekvatnog životnog standarda poljoprivrednog proizvođača.

II. IZVORI NOVČANIH SREDSTAVA

Član 3.

(Izvori novčanih sredstava)

Sredstva za realizaciju novčanih podsticaja iz člana 1. ovog Zakona obezbjeđuju se u Budžetu Srednjobosanskog kantona (u daljem tekstu: **budžet**) za svaku kalendarsku godinu i iz drugih izvora.

Član 4.

(Visina novčanih sredstava)

Visina novčanih sredstava iz člana 3. ovog Zakona koja se obezbjeđuju iz budžeta je najmanje 1,0% od poreznih i neporeznih prihoda u budžetu za tekuću godinu.

Član 5.

(Odluka)

(1) Iznos novčanih podsticaja, minimalni uslovi za početak proizvodnje, minimalne površine za investiranje i rokovi podnošenja zahtjeva utvrđuju se Odlukom o iznosima novčanih podsticaja, minimalnim uslovima za početak proizvodnje, minimalnim uslovima za investiranje i rokovima podnošenja zahtjeva (u daljem tekstu: **Odluka**), a koju Vlada Srednjobosanskog kantona (u daljem tekstu: **Vlada**) donosi za svaku kalendarsku godinu.

(2) Ministarstvo nadležno za poslove poljoprivrede Srednjobosanskog kantona (u daljem tekstu: **Ministarstvo**) u roku od 30 dana od dana usvajanja budžeta izrađuje prijedlog Odluke, organizuje javnu raspravu po prijedlogu Odluke, te nakon provedene rasprave istu dostavlja Vladi u roku od 15 dana, na donošenje.

(3) Vlada donosi Odluku iz stava (1) ovog člana u roku od 60 dana od dana objavljivanja budžeta u "Službenim novinama Srednjobosanskog kantona".

III. MJERE NOVČANIH PODSTICAJA

Član 6.

(Mjere novčanih podsticaja)

(1) Novčani podsticaji u smislu ovog Zakona obuhvataju podsticaje u sklopu mjera podsticanja proizvodnje i podsticanja u sklopu mjera strukturne politike.

(2) Novčani podsticaji u sklopu mjera podsticaja proizvodnji provode se kroz model proizvodnji.

(3) Podsticanje u sklopu mjera strukturne politike provodi se kroz:

- a) model kapitalnih ulaganja;
- b) model ruralnog razvoja;
- c) model ostalih vrsta ulaganja.

Član 7.

(Raspodjela sredstava)

Raspodjela raspoloživih novčanih sredstava za novčane podsticaje za budžetsku godinu vrši se tako da pojedinim modelima pripadaju odgovarajući udjeli u skladu sa raspoloživim sredstvima.

IV. MODELI PODRŠKE

Član 8.

(Modeli podsticaja proizvodnji)

U okviru modela podsticaja proizvodnji novčani

podsticaji obuhvataju:

- a) animalnu proizvodnju;
- b) biljnu proizvodnju;
- c) organsku proizvodnju;
- d) izvorne zaštićene pasmine.

Član 9.

(Animalna proizvodnja)

U okviru animalne proizvodnje podstiče se:

- a) govedarstvo;
- b) ovčarstvo i kozarstvo;
- c) svinjogojstvo;
- d) peradarstvo;
- e) pčelarstvo;
- f) ribarstvo.

Član 10.

(Biljna proizvodnja)

U okviru podsticanja biljne proizvodnje podstiče se uzgoj:

- a) ratarskih kultura;
- b) povrtlarskih kultura;
- c) voćarskih kultura;
- d) ljekovitog i aromatičnog bilja.

V. MODEL STRUKTURNE POLITIKE

Član 11.

(Model kapitalnih ulaganja)

U okviru modela kapitalnih ulaganja podsticaji se odnose na:

- a) ulaganje u nove nasade voćnjaka i vinograda;
- b) sistemi za navodnjavanje;
- c) objekti u stočarstvu;
- d) podizanje novih staklenika i plastenika;
- e) nabavka mehanizacije.

Član 12.

(Model ruralnog razvoja)

U okviru modela ruralnog razvoja se odnose na:

- a) povećanje konkurentnosti;
- b) zaštitu ruralnog okoliša;
- c) diverzifikaciju ruralnih aktivnosti.

Član 13.

(Model ostalih vrsta podsticaja)

U okviru ostalih vrsta podsticaja, a u zavisnosti od raspoloživih sredstava Vlada može podsticati:

- a) različite projekte iz oblasti poljoprivrede;
- b) aktivnosti različitih organizacija i udruženja koji su u funkciji razvoja poljoprivrede na području Srednjobosanskog kantona;

- c) subvencioniranje kamata na kredite u poljoprivredi;
- d) podsticaji za nadoknadu šteta u poljoprivrednoj proizvodnji.

VI. OPŠTI I POSEBNI USLOVI ZA OSTVARENJE NOVČANIH PODSTICAJA

Član 14.

(Upis u registre)

Kandidat koji želi ostvariti pravo na novčane podsticaje u skladu sa ovim Zakonom ima obavezu upisati se u Registar poljoprivrednih gazdinstava, odnosno Registar klijenta (u daljem tekstu: **registri**).

Član 15.

(Sjedište/prebivalište i područje)

Pravo na ostvarenje novčanih podsticaja može ostvariti kandidat koji ima sjedište, odnosno prebivalište na području Kantona, za proizvodnju koja je realizovana na području Kantona.

Član 16.

(Registrovana fizička lica)

Kandidat koji želi ostvariti pravo na novčane podsticaje, a ima registrovanu dopunsku djelatnost po Zakonu o obrtu, ostvaruje pravo na novčani podsticaj umanjen za 20%, a neregistrovano fizičko lice ostvaruje pravo na novčani podsticaj umanjen za 30%.

Član 17.

(Porezna potvrda)

Kandidat (pravno i registrovano fizičko lice) koji želi ostvariti pravo na novčane podsticaje dužan je dostaviti dokaz o izmirenju poreznih obaveza.

Član 18.

(Animalna proizvodnja)

Kandidat koji želi ostvariti pravo na novčane podsticaje za animalnu proizvodnju dužan je dostaviti potvrdu o zdravstvenom nadzoru životinje izdatu od veterinarske organizacije sa područja Kantona.

Član 19.

(Biljna proizvodnja)

Kandidat koji želi ostvariti pravo na novčane podsticaje iz oblasti biljne proizvodnje dužan je dostaviti originale, ne starije od šest mjeseci ili ovjerene kopije dokumenata, za zemljišne parcele na kojima se realizuje biljna proizvodnja i to:

- a) dokaz o vlasništvu zemljišta (ZK izvadak) ili posjedu zemljišta (posjedovni list), odnosno ugovor o zakupu zemljišta sa ZK izvadkom ili posjedovnim listom zakupodavca;
- b) kopiju katastarskog plana parcele.

Član 20.

(Potvrda o certificiranju)

Kandidat koji želi ostvariti pravo na novčane podsticaje u tekućoj godini za certificiranje organske proizvodnje dužan je dostaviti potvrdu o završenom certificiranju od međunarodno priznate certifikacijske kuće.

Član 21.

(Posebni uslovi)

(1) Posebne uslove i potrebnu dokumentaciju kojom se dokazuje ispunjavanje opštih i posebnih uslova za ostvarenje prava na novčani podsticaj propisat će ministar poljoprivrede, vodoprivrede i šumarstva Srednjobosanskog kantona (u daljem tekstu: **Ministar**) Upustvom o posebnim uslovima za ostvarivanje prava na novčani podsticaj.

(2) Upustvo iz stava (1) ovog člana Ministar donosi u roku od 15 dana od dana stupanja na snagu Odluke iz člana 5. ovog Zakona.

Član 22.

(Dokumentacija)

Kandidat koji želi ostvariti pravo na novčane podsticaje dužan je dostaviti dokumentaciju, propisanu ovim Zakonom i Upustvom iz člana 21. ovog Zakona, kojom dokazuje ispunjavanje opštih i posebnih uslova uz originalne ili ovjerene kopije dokumenata.

VII. KORISNIK NOVČANIH PODSTICAJA

Član 23.

(Korisnik novčanih podsticaja)

Korisnik novčanih podsticaja je kandidat koji je ostvario pravo na novčani podsticaj u skladu sa odredbama ovog zakona i podzakonskih propisa donesenih na osnovu ovog Zakona.

VIII. POSTUPAK ZA OSTVARENJE NOVČANIH PODSTICAJA

Član 24.

(Podnošenje zahtjeva)

(1) Za ostvarenje prava na novčane podsticaje kandidat je dužan podnijeti poseban pojedinačni zahtjev za svaku vrstu novčanog podsticaja.

(2) Kandidat u toku jedne kalendarske godine ima pravo podnijeti zahtjev za ostvarenje novčanog podsticaja za kupovinu jedne vrste mehanizovanog sredstva, priključaka i opreme.

(3) Kandidat ima pravo podnijeti novi zahtjev za ostvarenje prava na novčani podsticaj za nabavku mehanizacije nakon isteka roka od pet godina od dana ranije ostvarenog novčanog podsticaja, a opreme nakon pet godina od dana ranije ostvarenog prava na isti novčani

podsticaj.

Član 25.

(Donacije)

Kandidat koji je mehanizaciju ili opremu dobio po osnovu donacije nema pravo na ostvarenje novčanog podsticaja za nabavku te mehanizacije i opreme iz člana 11. ovog Zakona.

Član 26.

(Poslovi i zadaci općinske službe za upravu)

(1) Korisnik prava ostvaruje novčane podsticaje na osnovu podnijetog zahtjeva i prpratne dokumentacije općinskoj službi za upravu i odgovara za vjerodostojnost podataka sadržanih u istoj.

(2) Općinska služba za upravu, u skladu sa ovim Zakonom, programom i upustvom, zaprima, obrađuje, vrši provjeru dokumentacije, utvrđuje činjenično stanje na terenu, te dostavlja kompletirane zahtjeve Ministarstvu na dalji postupak u rokovima propisanim Upustvom.

(3) Zahtjevi koji se prosleđuju u Ministarstvo trebaju biti obrađeni u excelu i dostavljeni u elektronskoj formi na sredstvima za elektronski prenos podataka ili putem e-maila radi konačne obrade i odobravanja isplate odobrenih podsticaja.

(4) Zahtjev obavezno mora sadržavati registarski list poljoprivrednog proizvođača korisnika novčanih podsticaja.

Član 27.

(Zapisnik)

(1) Za svaki blagovremen i potpun zahtjev službenici općinske službe za upravu dužni su na licu mjesta utvrditi i zapisnički konstatovati činjenično stanje (obim proizvodnje, provedene agro-tehničke mjere, stanje usjeva sa očekivanim prinosima, zasnovanu i realizovanu proizvodnju, vrijeme započinjanja gradnje objekta sa stepenom izgrađenosti grubih građevinskih radova i sl.).

(2) Izuzetno od stava (1) ovog člana službenici općinske službe za upravu mogu izaći na teren ako nije dostavljena potpuna dokumentacija uz zahtjev i na licu mjesta kandidata obavijestiti koju je dokumentaciju dužan dostaviti i u kom roku, te zapisnički konstatovati utvrđeno činjenično stanje i obavezu dostavljanja dokumentacije.

Član 28.

(Provjera)

Službenici općinske službe za upravu mogu za svaki podnešen zahtjev za ostvarenje prava za novčani podsticaj i nakon zapisnički konstatovanog činjeničnog stanja izaći na lice mjesta i izvršiti provjeru, te zapisnički konstatovati zatečeno činjenično stanje.

Član 29.

(Postupak donošenje rješenja)

(1) Nakon konačne obrade i provjere prispjelih zahtjeva i dokumentacije, odnosno, provedenog postupka utvrđivanja ispunjavanja opštih i posebnih uslova, Ministarstvo donosi rješenje o ostvarenju prava na novčani podsticaj za kandidata koji ispunio uslove propisane ovim Zakonom i provedbenim propisima donesenim na osnovu ovog zakona.

(2) Za kandidata koji ne ispunio opšte i posebne uslove propisane ovim Zakonom i provedbenim propisima donesenim na osnovu ovog zakona Ministarstvo će donijeti rješenje kojim se zahtjev za ostvarenje prava na novčani podsticaj odbija kao neosnovan.

(3) Ministarstvo će donijeti rješenje o odbacivanju zahtjeva za ostvarenje prava na novčani podsticaj za kandidata čiji zahtjev bude neblagovremen i nepotpun.

Član 30.

(Žalba)

Rješenje iz člana 29. ovog Zakona konačno je u upravnom postupku i protiv njega nije dopuštena žalba, ali se može pokrenuti upravni spor tužbom kod Kantonalnog suda u Novom Travniku.

Član 31.

(Nalog za isplatu)

Za kandidata za kojeg se utvrdi da ispunjava opšte i posebne uslove za ostvarenje prava na novčani podsticaj Ministarstvo će rješenje iz člana 29. stav (1) ovog Zakona sa nalogom za isplatu novčanih sredstava dostaviti Ministarstvu finansija Srednjobosanskog kantona.

Član 32.

(Realizacija federalnih novčanih podsticaja)

Općinska služba u upravu će u skladu sa odredbama Zakona o novčanim podrškama u poljoprivredi i ruralnom razvoju ("Službene novine FBiH" broj 42/10) obavljati i poslove iz oblasti realizacije federalnih novčanih podrški koji se odnose na prijem zahtjeva, provjeru dokumentacije, obradu zahtjeva i utvrđivanje činjeničnog stanja na terenu, te dostavu kompletiranih predmeta Ministarstvu na daljnji postupak.

IX. IZVJEŠTAVANJE I ČUVANJE DOKUMENTACIJE

Član 33.

(Izveštavanje)

(1) Ministarstvo je obavezno Vladi dostaviti izvještaj o realizaciji novčanih podsticaja u prethodnoj godini najkasnije do 30. aprila tekuće godine.

(2) Vlada je obavezna da najkasnije do 30. juna tekuće godine dostavi Skupštini Srednjobosanskog kantona informaciju o realizaciji novčanih sredstava za novčane podsticaje za prethodnu godinu.

Član 34.

(Čuvanje dokumentacije)

(1) Ministarstvo je dužno čuvati tri godine, od dana pravosnažnosti rješenja, sve predmete sa kompletnom dokumentacijom.

(2) Kandidat je dužan čuvati dokumentaciju na osnovu koje je ostvario pravo na novčani podsticaj tri godine, računajući od dana uplate novčanih sredstva na račun kandidata.

Član 35.

(Baza podataka)

Ministarstvo vodi centralnu bazu podataka o svim vrstama novčanih podrški i korisnicima, i čuva je trajno.

X. NADZOR NAD PROVOĐENJEM OVOG ZAKONA

Član 36.

(Nadzor)

(1) Ministarstvo vrši upravni nadzor nad primjenom ovog Zakona i propisa donesenih na osnovu njega, koji su ovim Zakonom stavljeni u nadležnost Kantona.

(2) Ministarstvo vrši i nadzor nad općinskim službama u dijelu izvršenja kantonalne politike u oblasti novčanih podrški na teritoriji Kantona.

Član 37.

(Inspekcijski nadzor)

(1) Inspekcijski nadzor u provođenju ovog Zakona i propisa donesenih na osnovu njega obavljaju kantonalni poljoprivredni i veterinarski inspektori.

(2) Kantonalna poljoprivredna inspekcija:

a) provodi uvid u dokumentaciju koja se odnosi na ostvarivanje novčane podrške za animalnu i biljnu proizvodnju, za subvencioniranje kamata i novčane podrške za moderne tehnologije, ekološku proizvodnju i ruralni razvoj;

b) naređuje povrat novčanih podrški ostvarenih suprotno odredbama Zakona i propisa donesenih na osnovu njega;

c) naređuje otklanjanje nedostataka u vođenju evidencije za ostvarivanje novčanih podrški iz tačke 1. ovog člana;

d) provjerava zadovoljava li korisnik prava na novčane podrške uvjetima za ostvarivanje tog prava;

e) prikuplja podatke i obavještenja od odgovornih lica kada je to potrebno za obavljanje poslova;

f) obavještava nadležna tijela državne uprave o uočenim nepravilnostima i traži provođenje određenog postupka ako sama nije ovlaštena direktno postupati;

g) podnosi zahtjev za pokretanje prekršajnog postupka zbog povrede odredaba ovog Zakona i propisa donesenih na osnovu njega.

(3) Kantonalna veterinarska inspekcija provodi uvid u

dokumentaciju koja se odnosi na ostvarivanje novčanih podrškiza animalnu proizvodnju u okviru svoje nadležnosti.

Član 38.

(Predmet inspekcijskog nadzora)

(1) Ukoliko poljoprivredni ili veterinarski inspektor u toku vršenja inspekcijskog nadzora, utv rdi da su povrijeđene odredbe ovog zakona ili provedbenih propisa donesenih na osnovu ovog Zakona rješenjem nalaže da se utvrđene nepravilnosti, odnosno nedostaci otklone odmah, a najkasnije u roku od 15 dana od dana donošenja rješenja.

(2) U obavljanju inspekcijskog nadzora poljoprivredni ili veterinarski inspektor može privremeno oduzeti dokumentaciju i predmete koji u prekršajnom ili sudskom postupku mogu poslužiti kao dokaz, te zadržati iste do okončanja prekršajnog odnosno sudskog postupka.

(3) O privremenom oduzimanju dokumentacije ili predmeta iz stava (2) ovog člana poljoprivredni ili veterinarski inspektor obavezno izdaje potvrdu.

Član 39.

(Istinito prikazivanje proizvodnje)

(1) Ukoliko se utvrdi da su sredstva ostvorena na ime novčanih podsticaja utvrđenih ovim Zakonom i podzakonskim aktima donesenim na osnovu ovog Zakona utrošena nenamjenski ili su ostvorena na osnovu lažno prikazanih činjenica ili predočene lažne dokumentacije, kandidat je dužan vratiti novčana sredstva, zajedno sa zakonom propisanim zateznim kamatama, u roku od 30 dana od dana pravosnažnosti rješenja.

(2) U slučaju iz stava (1) ovog člana, kandidat može podnijeti novi zahtjev za ostvarenje prava na novčani podsticaj iz poglavlja III. i IV. ovog Zakona i ostvariti pravo na novčani podsticaj, ukoliko je ispunio sve uslove propisane ovim zakonom i podzakonskim aktima donesenim na osnovu ovog Zakona, nakon tri godine od dana povrata novčanih sredstava naloženih rješenjem.

Član 40.

(Žalba protiv rješenja inspektora)

(1) Protiv rješenja poljoprivrednog ili veterinarskog inspektora, donesenog u vršenju inspekcijskog nadzora u skladu sa odredbama ovog zakona može se izjaviti žalba Ministarstvu putem poljoprivrednog ili veterinarskog inspektora u roku od osam dana od dana prijema rješenja.

(2) Ministarstvo je dužno donijeti rješenje, u roku od 15 dana od dana prijema žalbe, koje je konačan upravni akt, a protiv njega se može pokrenuti upravni spor kod Kantonalnog suda u Novom Travniku.

XI. KAZNENE ODREDBE

Član 41.

(Novčane kazne)

(1) Lice koje učini prekršaj iz člana 39. ovog Zakona kažnjava se novčanom kaznom:

- a) pravno lice u iznosu od 5.000,00 KM do 10.000,00 KM;
- b) odgovorno lice u pravnom licu od 1.000,00 KM do 2.000,00 KM;
- c) fizičko lice u iznosu od 500,00 KM do 1.000,00 KM.

(2) Za prekršaj, uz novčanu kaznu izreći će se i mjera oduzimanja novčanog podsticaja koji je ostvaren odnosno nastao prekršajem.

XII. PRELAZNE I ZAVRŠNE ODREDBE

Član 42.

(Rok za preuzimanje poslova)

Do preuzimanja poslova koji su predviđeni ovim Zakonom od strane općinske službe za upravu, a ne duže od 1 godine od dana stupanja na snagu ovog Zakona, obavljat će Ministarstvo.

Član 43.

(Stupanje na snagu i primjena)

Ovaj Zakon stupa na snagu osmog dana od dana objavljivanja u „Službenim novinama Srednjobosanskog kantona“.

Broj:
Travnik, __. __. 2013. godine

SKUPŠTINA SBK
PREDSJEDAVAJUĆI